

UMP Sumbang Kepakaran dalam Misi Kemanusiaan Aceh



Acheh, 4 Mei - Dalam merealisasikan hasrat universiti terhadap memasyarakatkan teknologi, baru-baru ini Universiti Malaysia Pahang (UMP) menjalankan Program Misi Kemanusiaan dengan menyumbangkan kepakaran dengan menyediakan alat penapis air dan lampu solar bagi kegunaan penghuni dan anak yatim seramai 230 orang di Rumah Kebajikan Dayah Nurul Huda di Aceh.

Program membabitkan seramai 36 orang ini dianjurkan Persatuan Wanita UMP (Matahari) dengan kerjasama Persatuan Pelajar Fakulti Teknologi Kejuruteraan (ProTech). Turut serta 10 mahasiswa dari Universitas Syiah Kuala (Unsyiah) dan pengamal media dari negeri Pahang yang sama-sama menjalankan kerja lapangan dalam membantu membersihkan kolam-kolam air, mengecat dan membersihkan sekitar penempatan ini.

Ketua Timbalan Pendaftar (Penyelidikan dan Inovasi) yang merupakan Penasihat Persatuan Wanita UMP (Matahari), Datin Fazia Ali berkata, program pada kali ini melibatkan pelajar dan staf bertujuan menghulurkan sumbangan dan keprihatinan warga UMP bagi membantu mereka untuk mendapatkan keperluan asas yang lebih baik.



“Selain program mobiliti yang dijalankan pelajar, usaha ini dilihat sebagai suatu inisiatif menyokong agenda kesukarelawanan yang dilaksanakan UMP ke arah menjadikan universiti ini dikenali sebagai Universiti Komuniti yang mana kerja khidmat sosial ini diiktiraf dunia,” katanya.

Beliau berkata, program ini juga adalah hasil kerjasama pihak persatuan Wanita UMP dengan pihak Universitas Teuku Umar (UTU) dan Unsyiah khususnya Rektor UTU, Prof. Dr. Jasman J. Ma’ruf dan isterinya, Ardawalisa Abdurahman yang juga Ketua Darmawanita UTU yang banyak menyalurkan maklumat.

Pihaknya juga akan terus mengerakkan usaha mengumpulkan dana bagi menambahbaik kemudahan fizikal mengikut penilaian yang dibuat untuk dimanfaatkan penghuni di sini seperti mana dalam Misi Kemanusiaan Kemboja seperti yang dijalankan di sebelum ini.

Bagi Pengurus Rumah Kebajikan, Abu Khushairi Nordin, 31 berkata, pihaknya bersyukur dengan sumbangan pihak luar terutamanya dari Yayasan Pembangunan Ekonomi Islam Malaysia (YaPEIM) yang membantu mendirikan sebuah penempatan untuk tenaga pengajar.



Katanya, kemudahan yang disumbangkan ini pastinya dapat digunakan penghuni di rumah ini yang semakin bertambah sedangkan kemudahan yang ada hanya mampu memuatkan seramai 60 penghuni sahaja.

Sementara itu, pensyarah FTeK, Noor Asiah Mohamed berkata, program ini memberi peluang pelajar berkongsi idea dengan pelajar UTU dan perspektif dengan masyarakat Aceh. Pihaknya juga bercadang untuk meneruskan program ini pada masa akan datang dengan menambah baik sistem bekalan air terutamanya bagi tujuan memasak dan penggunaan di asrama perempuan serta meningkatkan fasiliti lain untuk menampung bilangan pelajar yang semakin bertambah.

Mahasiswa UMP, Muhammad Asmi Syamim Ahmad Sukri, 22, pengalaman ini memberikan cukup keinsafan apatah lagi berpeluang mendekati anak-anak ini yang berkongsi pengalaman berdepan dengan situasi kehilangan ayah dan ibu akibat peristiwa Tsunami atau kiamat kecil.



Berkongsi cerita Tsunami, seorang penghuni, Muhammad Arrif Jamaluddin, 12, yang kehilangan ayah berkata, sewaktu itu beliau masih dalam kandungan terselamat dan ibunya banyak menceritakan tentang kejadian bencana itu. Seronok dapat berjumpa dengan mahasiswa UMP, beliau bernekad untuk belajar bersungguh-sungguh dan berhasrat untuk berhijrah ke Malaysia. Begitu juga dengan Agistina Muhammad Jaafar, 12, dan kakaknya Zikriah, 14 yang kehilangan ayah dan ibu tatkala Tsunami bersyukur tinggal di rumah ini berbanding menjadi pengemis kerana mereka tiada tempat untuk bergantung.

Turut diadakan pertandingan mewarna kanak-kanak, program motivasi dan kesedaran kebakaran serta penyampaian sumbangan dana berbentuk wang tunai, peralatan persekolahan dan barangan berjumlah sepuluh ribu ringgit hasil sumbangan universiti, persatuan dan pihak luar.



Disediakan Unit Perhubungan Awam, Bahagian Komunikasi Korporat PNC

Posted By : SITI SARAH BINTI MOHAMAD RAJIMI Date Posted : 09-05-2016, 14:20:13